

# Dua aspek baharu PROTÉGÉ

Oleh KU MOHD. RIZDUAN KU ABDUL RAHMAN

**P**UTRAJAYA — Kerajaan melalui Kementerian Pembangunan Usahawan (MED) akan terus membangunkan Professional Training and Education for Growing Entrepreneurs (PROTÉGÉ) untuk membawanya ke tahap yang lebih baik demi membantu mencapai agenda ekonomi negara.

Ketua Setiausaha Kementerian itu, Datuk Wan Suraya Wan Mohd. Radzi berkata, bagi mencapai tujuan tersebut, dua aspek baharu akan dimasukkan ke dalam program PROTÉGÉ pada tahun ini meliputi kerjasama dengan lebih banyak syarikat serta membuka peluang latihan lebih luas dalam bidang itu.

Menurut beliau, aspek pertama adalah untuk menggalakkan lebih banyak penyertaan syarikat berkaitan kerajaan (GLC), perusahaan kecil dan sederhana (PKS) dan pertubuhan bukan kerajaan (NGO) ke dalam program PROTÉGÉ pada tahun ini.

"Sehingga Mac ini, seramai 2,300 pelatih yang komited dalam menjayakan program PROTÉGÉ. Kita juga akan melebarkan senarai tersebut kepada PKS dan NGO supaya para peserta program ini mendapat faedah sewajarnya," katanya yang menyasarkan program itu melatih seramai 15,000 peserta tahun ini.

Beliau berkata demikian pada majlis penutup PROTÉGÉ-Duopharma Biotech Berhad (Duopharma) dekat sini baru-baru ini yang turut dihadiri Ketua Sekretariat PROTÉGÉ, Norashikin Is-



WAN SURAYA (depan, tiga dari kanan), Norashikin (depan, kiri) dan Leonard Ariff (depan, dua dari kanan) bersama peserta PROTÉGÉ pada majlis penutup Duopharma di Putrajaya baru-baru ini.

mail dan Pengarah Urusan Kumpulan Duopharma, Leonard Ariff Abdul Sharar.

Wan Suraya memaklumkan, aspek kedua pula bakal menyaksikan MED melebarkan program berkenaan bukan sahaja dalam kalangan graduan bahkan kepada lepasan sekolah serta pemegang diploma yang masih menganggur untuk meningkatkan kemahiran dan tahap kebolehpasaran mereka dalam bidang keusahawanan atau pengisian pekerjaan sedia ada di negara ini.

"Kita berharap syarikat-syarikat berteknologi tinggi selepas ini tidak perlu lagi mengemukakan permohonan

untuk mendapatkan pekerja asing. Ini kerana jumlah peserta program seperti PROTÉGÉ dapat menampung keperluan yang sewajarnya dan ia selaras dengan gelombang perubahan ekonomi semasa dan Revolusi Industri 4.0," jelasnya.

Sementara, Norashikin berkata, bagi mencapai aspirasi kementerian serta memperluaskan pelaksanaan program ini, PROTÉGÉ bekerjasama dengan 13 universiti awam di seluruh negara khususnya dengan penglibatan sebagai rakan strategik bersama beberapa agensi di bawah MED yang merangkumi aspek kebolehpasaran dan keusahawanan.

Beliau menjelaskan, PROTÉGÉ akan mengambil bahagian dalam program karnival kerjaya dan keusahawanan yang dianjurkan oleh universiti awam bermula hujung bulan ini sehingga April depan.

"Program yang dinamakan PROTÉGÉ Reach-Out and Awareness bertujuan memperkenalkan inisiatif-inisiatif latihan yang dianjurkan oleh agensi di bawah kementerian ini kepada graduan. Ia juga terbuka kepada lepasan sekolah dan pemegang diploma serta orang awam," katanya.

Karnival tersebut dijadualkan berlangsung di Universiti Sains Malaysia pada 30 dan 31 Mac ini, Universiti Islam Antarabangsa Malaysia (2 & 3 April), Universiti Teknologi Mara di Shah Alam, Selangor (3 & 4 April), Universiti Malaysia Pahang (5 & 6 April), Universiti Malaysia Sarawak (10 & 11 April) serta Universiti Kebangsaan Malaysia dan Universiti Teknologi Malaysia (16 & 17 April).

Lokasi lain termasuk, Universiti Sultan Zainal Abidin (18 April), Universiti Malaysia Perlis (22 & 23 April), Universiti Teknikal Malaysia Melaka (23 & 24 April), Universiti Pertahanan Nasional Malaysia (24 April), Universiti Putra Malaysia (24 & 25 April) dan Universiti Malaysia Terengganu (25-28 April).

Dalam pada itu, Leonard Ariff pula berkata, pihaknya melabur kira-kira RM2 juta setahun untuk menyediakan tempat kepada pelatih program PROTÉGÉ dan sepanjang tahun lalu, Duopharma telah melatih seramai 64 peserta selama 12 bulan.